

Mid-Day Dogri News Bulletin,

08 February 2026 समे & 12:25 hrs.

HM-Hydro

जम्मू-कश्मीर च पनबिजली परियोजनाएं दी समर्थ दा समूलचा इस्तेमाल करने दी जरूरत पर लौऽ पांदे होई केंद्री गृह मंत्री अमित शाह होरें केंद्र शासित प्रदेश च चला'रदी बक्ख-बक्ख विकास परियोजनाएं दी प्रगति दी समीक्षा कीती। जम्मू दे अपने दौरे दे त्रीये ते खीरी रोज लोकभवन, जम्मू च इक उच्ची सतह दी समीक्षा बैठक दी अध्यक्षता करदे होई शाह होरें आखेआ जे प्रधानमंत्री नरेंद्र मोदी हुं'दी अगुवाई च केंद्र इक विकसित ते खुशहाल जम्मू-कश्मीर बनाने दे नजरिये गी लेइयै पूरी चाल्ली बचनबद्ध ऐ। मीटिंग मगरा वीरवारें चिरें रातीं जम्मू पुजे दे शाह होर नमीं दिल्ली परतोई आए हे। तकरीबन 2 घंटे तगर चली दी इस बैठक च उपराज्यपाल मनोज सिन्हा, मुखमंत्री उमर अब्दुल्ला, केंद्री गृह सचिव गोविंद मोहन, मुख सचिव अटल डुल्लू ते पुलस महानिदेशक नलिन प्रभात होर बी मौजूद हे।

<><><><><><><><>

Revenue-Gen

जम्मू-कश्मीर सरकारै विधानसभा गी जानकारी दिती ऐ कि केंद्र शासत प्रदेश च शराब दियां नमियां दकानां खोलने दा फिलहाल कोई विचार जां प्रस्ताऽ नेई ऐ। एहू गल्ल खजाना मैहकमे आसेआ एन.सी दे विधायक अर्जुन सिंह राजू हुं'दे आसेआ पुच्छे गेदे इक सवालै दे परते च दिती गेई। सरकारै पिछले द'ऊं माली ब'रे 2023-24 ते 2024-25 दे दरान जिलेवार हासल औडन दा जिक्र करदे होई दस्सेआ जे जम्मू जिले च सभनें शा मता राजस्व 2023-24 च हासल होआ। शराब दिएं दकानें शा हासल राजस्व 48 ज्हार 350 लक्ख 15 ज्हार हा उत्थे गै 2024-25 च एहू औंदन बधियै 50 ज्हार 913 लक्ख 93 ज्हार धोड़ी पुज्जी गेई ऐ। इस्सै

चाल्ली उधमपुर, कठुआ, साम्बा, रियासी, किशतवाड़, रामबन, राजौरी ते पुंछ जिलें च बी इस अवधि दरान आबकारी मैहकमे दी कमाई च बाद्दा दर्ज कीता गेआ ऐ।

<><><><><><>

US-India Map

भारत ते अमरीका नै जि'आं गै बपार पर दपक्खी अंतरिम समझौते दे ढांचे दे ब्यौरें दा ऐलान कीता, कल अमरीकी बपार प्रतिनिधि हुं'दे दफ्तर पाससेआ जारी भारत दे इक नक्शे नै ध्यान खिच्चेआ ऐ। सोशल मीडिया मंच पर सांझे कीते गेदे नक्शे च पाकिस्तान दे कब्जे आले कश्मीर सने जम्मू-कश्मीर दे पूरे इलाके गी भारती इलाके दे तौर पर दस्सेआ गेआ ऐ। इसै चाल्ली चीन आसेआ दावा कीता गेदा अक्साई चिन बी भारती इलाके दे तौर पर दस्सेआ गेआ ऐ जेहड़ा अमरीका दी तरफा इक महत्वपूर्ण संदेस ऐ। भारत नै लगातार इस गल्लै पर जोर दित्ता ऐ जे जम्मू-कश्मीर दा पूरा केंद्र शासित प्रदेश, म्हेशां थमां भारत दा इक अनट्रुट हिस्सा हा, ऐ ते म्हेशां रौह्ग। भारत इब्बी दावा करदा ऐ जे ऐतिहासिक दावें ते पिछली संधिएं दी बिनाह पर अक्साई-चिन भारत दा इक अनट्रुट अंग ऐ।

<><><><><><>

Rajouri op Sindoor

सेना प्रमुख जनरल उपेंद्र द्विवेदी होरें आपरेशन सिंदूर दरान सिविल ते मिलीटरी प्रशासन बश्कार तालमेल बनाइयै कम्म करने गितै राजौरी जिला प्रशासन दी सराहना कती ऐ ते एहदे लेई राजौरी दे जिला विकास कमिशनर अभिशेक शर्मा होरें'गी इस कम्मै च उन्दे शानदार नेतृत्व लेई चीफ ऑफ आर्मी स्टाफ कमेंडेशन कन्नै सम्मानित कीता गेआ ऐ। इस सम्मान च उं'दी तुरत प्रशासनिक प्रतिक्रिया ते कार्रवाई, फौज ते सुरक्षा

एजेंसिएं बशकार नेड़मा तालमेल बनाइए कम्म करने, आम लोकें दी सुरक्षा लेई कुशल प्रबंधन, जरूरी सेवाएं दी दस्तयाबी जकीनी बनाने ते टकोह्दा करियै बन्ने कन्नै लगदे सेवंदनशील इलाकें च जरूरी चीजें-बस्तें, सेवाएं ते सम्मान दी दस्तयाबी यकीनी बनाने च उंदी भूमिका दी सराहना कीती। उन्दे अलावा डीएसपी आप्रेशन्स शम्मी कुमार होरें'गी बी सेना प्रमुख प्रशस्ति सम्मान, आप्रेशन सिंदूर दरान उंदी भूमिका लेई दित्ता गेआ।



JK Tourism Award

मुम्बई दे जियो वर्ल्ड कन्वेंशन सेंटर च आयोजित OTM-2026 च जम्मू-कश्मीर गी साहसिक सैलसफा लेई बेहतरीन थाहर दा सम्मान दित्ता गेआ। जम्मू-कश्मीर सैलसफा विभाग नै बी अंतरराष्ट्री सतह दे इस आयोजन च हिस्सा लैता हा तां जे इत्थूं दी सैलसफा समर्थ गी बड्डे पैमाने पर उजागर कीता जाई सकै, टकोह्दा करियै कुदरत दे अनुकूल, सयालू खेड्डें, साहसिक सैलसफा, विरासती थाहरें दी सैर ते सेहत ते तंदरूस्ती सरबन्धी सैलसफा दे बारै च जम्मू-कश्मीर दी छमता गी सारें सामने रखने लेई। OTM उआं ते एशिया दा सभनें शा बड्डा आयोजन ऐ पर एह्दे च दुनिया भरै थमां सैलसफा ते यात्राएं कन्नै जुडे दे हितधारक हिंसा लैंदे ना। इस आयोजन च हिस्सा लैने ते एह् सम्मान हासल होने कन्नै जम्मू-कश्मीर दे सैलसफा क्षेत्र गी मता लाह हासल होने दी मेद कीती जा'रदी ऐ।



Sarthal Winter Festival

कठुआ जिले दियें बर्फू नै खटोई दी सरथल दियें उप्परलिएं प्हाड़ियें दी गोदा च “सरथल स्यालू उत्सव” दा सरिस्ता कीता जा’रदा ऐ, जित्थे संस्कृति, परम्पराएं ते स्यालै दा नोखा संगम दिक्खने गी लब्बोग। एहदा सरिस्ता सैलसफा निदेशालय आसेया जिला प्रशासन कठुआ ते बनी-बसोहली विकास प्राधिकरण दे सहयोग कन्नै कीता जा रदा ऐ- जेहदे च मकामी दस्तकारियें-खानपान दे पारम्परिक लोक गीत- संगीत ते परम्पराएं दे प्रदर्शन दे रुपै च रंगा-रंग कार्यक्रम बी दिक्खने गी लब्भगंन। इस आयोजन दा मकसद मकामी संस्कृति गी बढ़ावा देने दे कन्नो-कन्नो उत्थै दी सैलसफा समर्थ गी बी बड्डे पैमाने पर उजागर करना ऐ। प्रशासन नै लोकें अगगे अपील कीती ऐ जे इलाके दे खूबसूरत नजारें दा नंद लैने ते स्यालू गतिविधियें च हिस्सा लैने गितै उत्थे जरूर औन।

<><><><><><>